

## Von Marchiren.

**S**ann ein Lager fortzuech / so wird die Ordnung im Marchiren folgender gestalt am besten ange stellt: 1. Ziehen voran etliche Cornet Reutter / wegen die Strassen zu entdecken. 2. Ein theil Pionieurs vnd Zimmerleut / vmb Weg vnd Steg zu bessern / das das Geschütz vnd Munition Wagen ohne verhinderung hernacher kommen können. 3. Marchiren etliche Compagnie Fußvolck / den kein theil Proviant vnd Munition Wagen hernach folgt / darauff kommen wieder Reuter / wie auch nach denen Rüstwagen / vnd als dann Fußvolck / immer eins vmb das ander / bis endlich der Zug auch mit Reutterey beschlossen wird.

Das Fußvolck marchiret 5. oder 7. stark in einem Glied / ein Mann neben dem andern / auch 2. Schuch vngleich / vnd ein Glied nach dem andern / auf 5. Schuch nach / die Reuter ziehen gemeiniglich 5. stark in einem Glied / bey dem Geschütz ziehen allzeit gemeiniglich die Cannoniers vnd Pionieurs, wie auch bey den Rüstwagen allzeit Schmidt vnd Wagenmeister sein / Wann man den Feind hinder sich hat / ihm aber kein Stand halten wil / so muss man auch durch Wald vnd enge Weg fortziehen / damit er kein gelegenheit hab sich zu colligirn vnd anzugreissen / Wann man aber mit dem Feind zu schlagen begeht / so ziehet man durch das offene breite Feldt in solcher Ordnung / wie aus beygesetzter Ordnung zu sehen.